

詔朕聞善政之報靈貺不違洪化之符神輸必至朕以寡薄辱奉丕基德未動天惠非感物而去正月卽位之日但馬國獲白雉一二月十日尾張國言木連理閏二月二十一日備後國貢白鹿一或體誤曉月羽毛映於丹墀或幹凌寒霜枝柯被於青鄴皆應符改色感祥變容豈人事乎蓋天意也當是上玄錫祉下民蒙恩今若仰而不宣謂朕辱昧思與海內同此休徵亦夫因瑞建元非無故實嗣位紀號既有前聞况今柘燧改烟霞灰正氣風物和暖卉木繁滋宜逮佳辰以開寶運其改貞觀十九年爲元慶元年自今日昧爽以前大辟以下罪無輕重已發露未發露已結正未結正繫囚見徒悉皆原放但犯八虐故殺謀殺強竊二盜私鑄錢常赦所不免者不在赦例又內外文武官主典已上賜爵一級元正六位上者廼授一子五位已上子孫年廿已上者叙當蔭之階僧尼滿位已上加位一階元大法師位已上者廼授弟子夫以九州雲接百郡星連天降禎祥地有處所宜復尾張但馬備後等三國百姓當年徭役十日就中瑞所正出特須優矜元禽葦田郡勿輸今年之調春部及養父郡並免當年之庸元接得神物者多治比部橘但馬公得繼等叙正六位上賜物准例看著珍木者僧道能到岸等授位二階並賜物准例庶使鴻休罔極流遠近而普霑鳳曆無疆配乾坤而彌久主者施行元慶元年三月六日

〔改元部類〕外記日記云承平八年五月廿二日戊辰略中詔朕夙膺慈暉虔奉叡圖萬姓爲心荷責之憂自切四海在念負重之懼彌深履薄馭朽九載于茲而保章司曆去春奏以厄運之期坤德失宜今夏驚其地動之異靜思彼咎實疾于懷方今訪遺風於西漢畏驚誠而開元檢舊跡於先朝忌革命而改號是則修德勝災興物更始之意也可改承平八年爲天慶元年大赦天下今日昧爽以前大辟以下罪無輕重已發覺未發覺已結正未結正及犯八虐者皆悉赦除又一度竊盜計贓三端已下者同放免但強竊二盜故殺謀殺私鑄錢者不在此限又承平三年以往調庸未進在民身者同亦免除若興善之非忘何轉禍之可疑宣布遐邇俾知朕意焉主者施行

〔革命勸文上〕元應三年大外記中原朝臣師緒勸例應和元年例